



La basa dal mür mort ad Ardez han las partecipantas e'ls partecipants fat cun craps plü gronds e pesants.

FOTOS A. ARQUINT

Voluntaris s'ingaschan per cuntrada e natüra

Mürs morts vegnan refats sur il cumün dad Ardez



DA FLURIN ANDRY / ANR

■ Desch personas passaintan quists dis ad Ardez ün'eivna da vacanzas cun refar ün mür mort. L'acziun da la SUS e la Pro Natura es organisada cul sustegn da la Pro Terra Engiadina.

Tanter il cumün d'Ardez e Chanoua refan quist'eivna desch homens e duonnas ill'erà da 30 a 65 ons ün mür mort. Els vegnan instruits da *Felix Riegger*. Il giardinier per cuntradas independent da Basilea Champogna s'ha specialisà avant vainch ons per mürs morts: «Quists mürs faivan ils paurs sainza molta, cul material chi d'eira avant man in surabundanza, cun crappa», declera Riegger. El ha il sustegn da seis assistent *Flavio Bucher*. I sun incumbenzats da la «Stiftung Umwelteinsatz Schweiz» (SUS). Quella s'ingascha daspö l'on 1976 pel mantegnmain e la chüra da la cuntrada. Insebel culla Pro Natura organisascha la SUS minch'on var 23 eivnas da quistas vacanzas particularas: Sco ad Ardez quist'eivna e dals 24 als 30 gün i'ls contuorns da Bivio cul manader *Michael Gostelli* imprendan voluntaris da specialists co chi's fa quists mürs morts. Per organisar l'eivna in Engiadina Bassa hana gnü il sustegn da la fundaziun Pro Terra Engiadina e per l'eivna sur Bivio quel da rapreschantants dal Parc Ela.

«Da tuottas sorts motivaziuns»

Sco cha'l manader da l'eivna ad Ardez Felix Riegger disch han ils partecipants tuot differentas motivaziuns per far da quistas sorts vacanzas: «Ils üns fan quai per pudair fabricar lura svessa da quists mürs in lur üerts, oters vöglian esser activs in

lur vacanzas e prestar üna lavur ütila ed amo oters giordan simplamaing la cumpagnia.» Ad Ardez sun activs quist'eivna ün hom chi lavura i'l sector da l'ambiant, üna magistra e mamma da Gosau, duos architects oriunds tudais-chs ed ün impressari independent vallesan chi less as perfecziunar ed imprendar a far mürs morts. «Pro quistas eivnas esa uschea chi lavuran in lündeschdi e mardi, in marcurdi hana liber e pon scuvrir la regiun, in gövgia e venderdi suna darcheu activs sül plazzal da fabrica.» Sia aigna motivaziun es la fascinaziun ch'el ha per quista tecnica veglichma da far mürs chi's chatta in tuot ils territoris muntagnards. Perquai piglia Riegger eir regularmaing part ad inscuters internaziunals in pajais da las Alps cul tema mürs morts: «In quistas occasiuns barrataina experienzas e preschantain als collegas da nossas lavuors.»

«Mürs chi dan structura a la cuntrada»


Per pussibilar da cultivar chomps ed avair prada main stipa sun gnüdas terrasadas illas regiuns muntagnardas sco l'Engiadina Bassa grondas parts dal terrain agricul. «Quists mürs morts chi s'ha fat per avair terrasas sun elemaints da la cuntrada agricula e tilla dan eir structura», declera il giardinier per cuntradas Riegger, «il prüm hana rodla giò la crappa plü gronda per avair la basa dals mürs morts, lura miss lasura craps plü pitschens e plü fins e lura darcheu da quels plü gronds per stabilir il mür.» Cun l'ir dals ons dvaintan ils mürs morts però istess instabils. «E no tils refain darcheu avant chi croudan in

muschna.» Cha'ls mürs hajan però eir üna valur ecologica, agiundscha'l: «Els sun eir il dachasa ed il zop da bleras bes-chas. Perquai ha eir la Pro Natura interess cha'ls mürs gnian mantgnüts.»

Cuors da far mürs morts in Samignun

L'on passà han refat voluntaris d'urant ün'eivna da vacanzas da la SUS e la Pro Natura eir in Samignun üna dunzaina da meters mür mort illa costa tanter la fracziun Laret e la via chantunala. *Andri Arquint*, silvicultur da revier e manader dal servezzan tecnic da Samignun, vaiva proponü il lö da lavur: «I's tratta d'ün mür cun üna lunghezza da var tschient meters», declera'l, «perquai es il cumün cuntaint ch'el ha eir ingon d'urant trais eivnas, fin als 22 gün, gliud chi cuntinuescha a refar il mür.» Quista jada as tratta dad 11 homens chi praistan servezzan civil ed ün manader da la SUS. Els refaran quist on circa 70 meters dal mür mort suot Laret. «In gövgia, ils 14 gün, dà la SUS a paurs ed otras personas interessadas ün cuors co chi's fa mürs morts», disch Arquint, «il cuors vain finanzia da la Pro Terra Engiadina e sustgnü dal cumün da Samignun.» Il cuors cumainza a las 10.00 e düra fin a las 15.30.

Annunzchas pro Karl Jenal-Danner per telefonin 079 611 12 42 o per mail: karli7@bluewin.ch. Il cuors es gratuit.



La Quotidiana
7007 Cuir
081/ 255 57 10
www.laquotidiana.ch

Medienart: Print
Medientyp: Tages- und Wochenpresse
Auflage: 4'063
Erscheinungsweise: 5x wöchentlich

Seite: 13
Fläche: 122'836 mm²

Auftrag: 1076289
Themen-Nr.: 808.004

Referenz: 69903911
Ausschnitt Seite: 3/5



Suot Laret in Samignun ston ils homens dal servezzan civil impedir cha la crappa roudla giò da la costa.



Il piazzal da lavur es sur il cumün d'Ardez in vicinanza da Chanoua.



La Quotidiana
7007 Cuir
081/ 255 57 10
www.laquotidiana.ch

Medienart: Print
Medientyp: Tages- und Wochenpresse
Auflage: 4'063
Erscheinungsweise: 5x wöchentlich

Seite: 13
Fläche: 122'836 mm²

Auftrag: 1076289
Themen-Nr.: 808.004

Referenz: 69903911
Ausschnitt Seite: 4/5



Cun tender cordas vegna guardà cha'l mür gnia gualiv.



A la riva dal Schergenbach in Samignun vain la crappa preparada.



Eir ün chan es ad Ardez da la partida.

FOTOS F. RIEGGEI



Insembel vegnan rodlets ils craps sur Ardez fin chi sun al dret lö.



Vista da suringìo vers la via chantunala chi passa in Samignun suot la fracziun Laret oura.